



*Sabtu, 09 Oktober 2021*

**Ogen: 1 Korinti 7:21**



**Makeken Kesempatan Nggeluh**



**H**idup ini adalah kesempatan...enda me nina sada lagu rohani si megati sidengkeh ntah pe si endeken. Ya, kesempatan ntah pe waktu si ibereken Dibata man banta i bas kegeluhen enda. Kesempatan nggeluh mehuli, nampati, nehken kekelengen, jadi pasu-pasu. Tapi la kepe kerina manusia makeken kesempatan enda alu mehuli, lit ka nge ipakena waktu sibereken Dibata alu la payo. Bagi nina belas-belas...hati-hati, kejahatan datang bukan karena ada niat tetapi karena ada kesempatan.

I bas renungenta wari enda ibabai kita alu sada pengajuk makeken kesempatan, i bas kontek jadi kalak bebas ntah tetap jadi budak. Enda pilihan hidup. Rasul Paulus nehken kata man perpulungen Korinti gelah tetap nggeluh bagi tangtangna jadi kalak kristen nai, ergiah-giah, paguh, nggeluhkan geluhna kuga kin situasina. I bas sie kerina rusaha jadi kalak si lebih mehuli, maju cara rukur ras cara geluhna erkiteken Kristus. Mengubah geluh ku siterulin. Bagi nina kalak pentar 'Setiap orang berpikir untuk mengubah dunia, tetapi tidak ada yang berpikir untuk mengubah dirinya sendiri'. Arah kata enda pe iajuk kita kalak si enggo ipilih Dibata guna ngaloken keselamatan si isikapkenNa gelah menaken kerina si mehuli subuk sura-sura ras perjuangan geluh ibenaken ibas dirina jine.

Kerina manusia ngaloken kesempatan siibereken Dibata tapi la kerina ngasup makekenca alu mehuli. Nggeluh terilin asa sienggonna, sienda banci ilakoken alu ngubahken si la mehuli ku siterulin, mekijat jadi mejingkat, tetap ras tutus erlajar. Moria GBKP jadi min agen perubahren si mabai diri ras isi jabu bagepe sekelewetta jadi kalak siluar biasa mengubah kegeluhen ku siterulin. Lit denga kesempatan, ula tunda.